

四庫全書

集部

欽定四庫全書

集部

潛齋集卷一

詳校官庶吉<sub>臣</sub>李如筠

主事<sub>臣</sub>呂雲祿覆勘

總校官進士<sub>臣</sub>繆琪

校對官中書<sub>臣</sub>王家賓

謄錄監生<sub>臣</sub>陳炳

欽定四庫全書

集部四

潛齋文集附鐵牛翁遺稿一卷別集類三

宋

提要

臣等謹按潛齋文集十一卷宋何夢桂撰夢桂字巖叟別號潛齋淳安人咸淳元年進士官至大理寺卿引疾去築室小酉源宋亡後隱居不仕元至元中屢召不起終老于家此集凡遺詩三卷詞及小試策一卷雜文七卷

詩頗學白居易體殊不擅長王士禎池北偶  
談以酸腐庸下詆之則似乎已甚文則頗援  
引証佐博辨自喜之意明成化中其八世孫  
淳訪得舊印本于同邑汪廷貴家校正刊行  
後其遠孫之論等又為重刊考元盛如梓庶  
齋老學叢談載夢桂送留夢炎一詩曰昆明  
灰劫化塵縉夢覺功名黍一炊鍾子未甘南  
操改庾公空作北朝悲歸來眠裏吳山在別

後心期浙水知白髮門生羞未死青山留得  
裏遺詩蓋夢桂為夢炎所取士故是詩有王  
炎午生祭文天祥意而是集不載則其散佚  
亦多矣末附鐵牛翁稿一卷鐵牛翁名景福  
字介之夢桂族孫元時不仕存詩四十餘首  
賦一首詩頗奇偉氣格在夢桂上云乾隆四  
十三年九月恭校上

總纂官臣紀昀  
陸錫熊臣孫士毅

欽定四庫全書



提要  
三

總校官 臣 陸 費 墀

欽定四庫全書

潛齋集卷一

宋 何夢桂 撰

五言古詩

上崔中丞古意二首

明月墮我簷白雲生我屋  
明發起振衣出戶聊躑躅  
青冥下輜軒皇華照幽谷  
乾坤散清氣固不在惡木  
岩岩南山石上有孤生竹  
結根不擇地天地聊自足  
卷耳不盈筐綠芻不盈掬  
願言勿采采留此媚幽獨

贈方星翁

憶別二十年再見驚莽渺黔髮上星霜紅顏化枯槁隔  
世或相逢往事漫不攷季子舌尚存長卿心未老妙算  
出星躔窮搜入冥窅病質愧衰遲高論驚絕倒天地兩  
無情大化長浩浩逝者如川流朝露溘春草行行重行  
行貞名以為寶

入夏初晴

屏翳盜天權豐隆據天宇沴陰抗六陽入夏苦旬雨煉



石無媧皇天漏誰與補羲和駕赤輪  
脩覩朝旭吐泥蟲起躑躅淖羽鼓  
掀舞倚杖擬郊行脫屣始出戶喜氣  
薄林巒生意溢蘅杜天公本無心造  
物誰實主今昔倏變化陰晴孰吹煦  
我欲叫蒼蒼叩閭撾天鼓蒼生在巔  
崖何時脫辛苦

贈唐樂天星翁

有客傲今世去古見是人得姓遺唐  
譜自號樂天民毋乃香山老重來現  
後身問君何能解滿口談天星術高

價難酬索詩抵千金我政坐詩窮敢以窮累君君謂窮  
不憂詩賦樂我貧不見石友死錦帆不斂形不見鄧侯  
餓銅山化為塵命固受於天誰能躍陶鈞外物不可必  
吾已反吾真君看世上兒疾走方紆紆

送自然子夏德甫

子以自然名詰我自然理至理本無言有言已非是畏  
佳時怒號厲風從何起晚得復怒生春雨果誰使使然  
與不然萬化誰與紀君詰我不知不如兩忘已君苟未

忘言請問柱下史

送天約子胡子春

世人方熙熙我獨處落落世人方昭昭我獨混濁濁我  
行世固疑世棄我自樂馬蹄踐霜雪寧期受刻碣羸尻  
登俎豆何如食糟粕不知帝懸解甘受人撻鞭回首觀  
環中乾坤本寥廓

贈天遊子潘知非

浩浩天上水悠悠天際雲靜觀萬物化誰使之芸芸吾

道在宇宙與物同津溟牛馬誰毀譽龍蠖自屈伸浮游  
寄一世儻然忘我人究竟弗可詰與子俱愚哉

贈天台陳道人

山中老希夷長抱白雲睡睡覺呼蹇驢悠然出山去道  
上忽相逢為問天下事長笑不復言不言有深意蒼生  
在巔崖感此淚如雨

方鈞隱挾星學求詩且業醫

駢拇不碍履枝指不害持兩者各自適意其天所為決

之足反蹇齧之手反萎萬物固有命勸君休說醫

贈楊古澹

名融武強人

南山有岑樓岑樓高落星娟娟樓上女悠悠撫朱繩高  
年猗蘭操翻作長短清世無千古人惟遺千古心心長  
韻愈遠疏越難可聞曲盡無人聽月高風滿城

和徐權院唐佐見寄七首

苒苒歲月晚悠悠美人思皎皎在天月娟娟落水涯相  
思何所寄日莫折瓊枝衰鴻翅翎短苦為稻粱縻願言

化為雲長與龍相隨

白雲古樹杪下有山人家與君曾讀易探索入聖涯盤  
桓坐白石汲泉燒鼎茶至今山中兒羨我兩客嘉客去  
不復來屋上凝朝霞有時撫孤琴猿鶴聽無譁何當賦  
招隱共駕青牛車

月冷岸葭蒼風勁山木震搗砧誰家婦聲急心緒紊為  
問聲何哀聲聲怨時運何許從英皇蒼梧叫虞舜

孟冬寒氣至蟋蟀入床下我早索衣裘婦尚繫裙布時

序修改變悽慄感霜露姑老遠行役鞠子誰乳哺夜半  
山壑移人生況旅寓傷心重傷心江空歲華暮

南山有高樓青雲可俯踐樓上有佳人當年慣識面忽  
覺在他鄉綽約思目見綠綺無知音心長曲未遍青雲  
在山頭將去還復戀人生不如雲欲見萬里遠恃有青  
銅鏡與君各分半忽來雙鯉魚白璧何足羨

望有玉山果細實如房蜂世味羞桃李棄此盤盞中膚  
頑味更澁僅能殺三蟲賴以著微績始襲炎帝封不意

得君采致身願相從

人懷千歲憂常苦百年速千歲與百年黃泉總相逐漆  
園何誕妄養生託緣督邯鄲非渺茫夢覺驚黍熟生死  
如彼何愛惡亦徒欲俛仰宇宙間吾姑抱吾獨

和盧可菴悲秋十首

秋風來庭際奄忽老蓐收夜寒耿無寐起坐焚膏油孤  
燈照我影對坐自倡酬倡參意未竟參橫轉西樓

秋風來高樓樓上棟雲飛登樓杳西望陰陰天雲垂天



闊渺無極遊子去不歸不歸在何許意採南山芝

秋風來戶牖出戶天地寬俯仰何跼蹐天地猶盤盤況復中間人機險一黃間毋懷千歲憂且盡百年歡

秋風來木末忽忽吹晚晴木落雁南歸嚶嚶多悲聲少壯老復至歲月方遄奔我欲歌秋風愁聽簫鼓鳴

秋風來萬壑蜴蜥吐冰雹雷吼彈丸飛四海沍陰濁誰能彎天弧與我一矢落奈何山嶽移回頭已非昨

冰雹事出

夷堅志坡詩有能御渠水作冰雹之句云

秋風來岩谷萬竅生寂虛畏佳忽怒號披拂其誰居天  
地等一馬逝者無停車君看郭外塚荒丘無人鋤

秋風來江皋槌鼓誰載酒徒羨謫仙人百篇醉一斗將  
軍告身在尚可易醇酎萬事休皺眉一笑且開口

秋風來天河天河淺且清天孫撫機杼終日織不成自  
從夫君去聽盡金雞鳴妾身倘未死妾心百煉精

秋風來大地萬里成丘墟床頭何所有惟有一卷書曳  
縱朗長誦環堵樂有餘自笑飯顆山少陵真腐儒

秋風來太虛逍遙浮大庭吾身與天地等如水上萍  
九閒往來意行還微吟吟盡無人聽惟遺空外音

上夾谷書隱先生六首

堪輿渺無極俯仰慨古初皇風戰涿鹿草野傷血塗  
華襲文明不肯私均朱誓命纘王業侵伐紛霸圖  
春秋二百祀已矣吾道孤天不生夫子民極誰其扶

反袂歎麟折過門傷鳳衰奠楹不復作世喪禮樂墮  
喪道不喪文豈不在茲千載而有人三代猶可追  
吾聞

夾谷翁文獻尚有遺斯世微斯人皇皇吾安歸

錦峯有使星光芒夜燭天聞道繡衣來上應此星躔兒  
童爭迎拜不敢持一錢一錢不足云愛心重留連輒持  
一盃水滴滴釣臺前

衣冠墮塗炭血肉膏斤斧喜聞使車來猶歌來何暮蒼  
生在顛崖惟恐隔風雨誰為埋車輪渾家白雲住下有  
羊裘翁清風清萬古

平生學屠龍終乃成履狶國亡身未殞幾死竟何如衣

帶日以緩鬢髮日以疎晨風懷苦心不能高奮飛獨抱  
三聖易終焉老吾廬

驥老不適用狐首復何幾身名與世隔誰以告彼姝衷  
腸遠難訴載訴出戶衣出戶亦不辭疑我故步非袖中  
懷綠綺自傷知音稀為君試一彈霑襟涕漣濡

擬古五首

木落不離根菊槁不離枝人懷父母心豈願生別離皇  
路塞幽蔽民用嬰百罹南枝栖越鳥忍逐北風飛北風

藐萬里分此無回期骨朽化為塵冤鬼將南歸

生為結髮婚死為同穴鬼豈意冰上緣淪沒隔萬里半  
鏡隨塵沙嫁衣在中笥紅絲倘未絕白首尚歸止心隨  
碣石雲淚落銅盤水雲飛會南來水流還北注此生不  
可期心期最來世

萬馬蕭蕭來萬夫的鳴蛾眉逐羈帛淚盡眦血零偷  
生愧夫天寧死化鬼燐昭質誓不污九死志靡徵紅玉  
隨劍光晶瑩貫列星遺骸莖螻蟻冢墓高媧陵

封狼藐萬里風雪饒陰山地荒走蛇豕俘繫去不還高  
門誰氏子受驅牧猘捷去時紈袴敝羶毳不蔽寒夜夜  
望北斗不逐南箕旋父母生我初拊我掌股間豈意越  
在茲撫身空自憐

杞國天柱傾哀我鞠子疚蒼鷺飛冲天妖星大如斗簾  
下玉床移山摧石鰲負河南弔遺黎原野骨未朽北邙  
望孤陵古木叫猿狖朔風吹塵沙天寒薄翠袖南雲山  
萬重去去莫回首

岳帥寄烈女古意和韻答之

降筆

一琴久絃絕孤操誰與同  
羅幃長白髮燕子樓已空  
夫君邈萬里目斷隨冥鴻  
鴻飛不南來亂鳥啼朔風  
寧死化為石石上生虬松

賦風花

玄化浩無極豈為萬物私  
燕坐觀物化榮悴故有時  
春林著寒葩猶記去年枝  
日暮還復殞委運不可羈  
天機自高下時命非所知  
變化紛萬感逝者長如斯  
誰能渺



獨立終古以為期

大鈞播萬物靜觀自森著  
倏見朝華榮夕隕亦何遽  
升沈信天機高下兩無據  
世眼空紛藉往事逐飛絮  
今年花上枝去年花落處  
開落無常期年來復年去

雪樓程御史次方山房韻見寄用韻答賦三首  
萬物委橋運逝水無回波  
美人渺何許道遠空寤歌  
願言結瑤珮乘虬下陽阿  
陽阿有瑤草為我起宿痾  
行行望高臺日暮將奈何

青樓有蛾眉翳袖渺獨處日暮賦標梅愧我求彼士誰  
家操孤鸞感此中夜起明河落天西玉繩低欲輕結言  
藉媒勞恩重報無地明珠在羅襦誰能諒心事

思君隔山陂矢心誓白水夢蛭各自憐人生貴適意馬  
頭黃金羈不易牛背睡白髮難再玄百子空自許南山  
或可移愚公有孫子堪與浩無窮俯仰一寤寐

遠遊丞樵隱王德甫寄詩輒和二章以謝

白日過駒隙玄髮成衰翁陞天無八翼苦志懷晨風晨

風不可企下界塵冥濛去去藐八極安能離殼中為馬  
或為牛吾將安適從

宿昔夢見君晨起得詩冊詩中意如何閔我遠行役上  
言久別離下言長寤擗世無魯陽戈誰能迴白日白髮  
一夜生為君隱隄側

和夾谷書隱先生寄題蛟峯石峽書院三十韻  
堪輿運玄化萬物品彙分狃狃鹿豕羣中有五色麟聖  
哲不出世郊圉可能馴粵從光嶽分鴻靈咸糾紛征役

石漸漸戰伐車轡詩亡春秋作三嘆悲聖人西狩折  
其足反袂那能聞而況千載下遺軼已絕塵木鐸響不  
振安能此身親冥冥晦暮夜高燎誰煬晨縱橫紛季子  
法律慘商君吾道成說輻君子歎伐輪時無郢人鼻誰  
運匠石斤世喪道未喪氣盛化自神無道固耻穀有道  
亦耻貧蛟翁世耆俊皇華重諏次公早識面次第以  
禮賓廼聞抗高誼木石將終身雲間有山峽劫火不得  
焚石間有書室雪迹猶未陳當路風詩書出此屋壁文

青青集衿風昂爾小子勤斯道未墜地百世知所因苞  
栩成集鵠白茅尚包廩終期人臯稷相與帝華勲中立  
天地極再還風俗淳願言放策許使得老轅申吾為混  
沌氏抑為葛天民俯仰慨今古悠悠秋復春夜半舟壑  
移故者誰其新

寄謝夾谷書隱先生四十四韻

淳居浙尾去天為最遠自親附以後繡斧所  
未嘗至耳目亦所不及邑官吏毒民惟恐不

至民號籲弗聞去年十二月縣尹以催徵來  
諸鄉挾猾吏悍卒以行所至大擾邑逸民何  
某具肴酒執贄以見尹怒弗出郊執繫僇辱  
之於是按使夾谷相公書隱先生埋輪於錦  
峯繡嶺間廉訪所及委屬官下邑歸問迨春  
仲閱實賊狀以聞議罪有差命下邑士民鼓  
舞更生某受恩隆邇輒賦詩四十四韻以謝  
修辭弗工姑寓銜結不忘之意云爾辭曰

粵從太極分大塊溟滓洩人生於其間三才位成列人  
極苟不立清寧將竭裂厥初始斷鰲萬古功卓絕誰觸  
不周山地摧天柱折媧皇不煉石方圓成陷缺九載困  
懷襄束柱至西碣乘載微司空斯民化魚鱉上下三千  
年世變幾更迭誰與持風輪不至人類滅魯廟祠太牢  
漢庭定綿蕤澤國訪羊裘東都樹名節斯道無存亡惟  
人善顯設先後雖殊途彼此有同轍山豕摧且傾川流  
沸將竭托身止徬徨勞心苦忡惛時無武城偃誰知堂

下蔑吏來方叫囂我行方蹙蹙賓主成寇讎樽俎化縲  
紲楚市愧受鉗山東羞折頸無處籲是天甘心死岩穴  
維北有星躔煌煌西柄揭皇帝哀不辜分符理司臬令  
出風霆行章分雲漢扶垂光燭幽壤萬里悉昭晰汲綆  
出深淵千仞藉提挈自顧此身微天地一甕螻自笑往  
事非古今一劍呖鳥卵來儀羽駿骨致汗血犁然心自  
孚難以口騰說衣冠出藻色詩書響木舌從此公道開  
起我庶士揭不圖老轅申復見人稷卨蒼生在巔崖寄



命方枘隄山下豺狼多況復晝噬嚙皇皇倘無歸惇惇  
靡遺子四海望公來久旱望霓切惟有此西人謂私我  
西浙永言誓澄清且為沃焦熱次第雨八荒寧久民望  
缺巖瀨有男子苦心頭半雪受恩口難言寤歎惟契契  
延佇羗思君解佩願遺玦遺玦不可得采芳聊薄擷

送野塘王經歷三十韻

世變浩無極俯仰長吁嘻人情恩與讎相值每不期邯  
鄲至受兵何與魯酒醺弄丸本無心乃解兩家圍懷古

意未竟傷今有餘悲世無武城宰偃室有誰歸世無吳  
興令牛屋奚敢辭不虞涉吾地叫囂且突隳樽俎化桎  
梏賓主生戎夷范睢幾拉髀蔡澤成領頤自憐還自笑  
此物至矣宜犁牛受鞭繫文貍墜阱機此豈物有罪罪  
在角與皮安之若有命雖死無悔追俄聞天際星一夕  
躔次移光芒照人間是為使者車翩然下青冥持斧衣  
繡衣文章星斗爛號令雷霆威幕府遴高選分遣羽檄  
飛君來山水縣草木生光輝洗手奉三尺不肯枉毫釐

登山縛虎兕入水擒蛟螭斯民久瘡痍嫗煦以母慈遂  
使斯道福溥及山澤癰盤水無先容傾蓋無素知南北  
風馬牛何以極至斯生物不言功固匪天地私寸草猶  
有心那得報春暉臨行持盃水勸君重躊躇為我更持  
獻端謝夾谷師

和邦岩讚易傳來韻

三釜養弗違五斗腹已饜歸無買山銀聊占白石崦崦  
西有斗室草色青入簾有時獨悲歌白雲低覆簷心勞

髮成絲不敢開鏡奩純鈎未曾試敢謂鉛刀銛行行  
復止恐為世猜嫌俯仰宇宙窄吾姑養吾恬濯髮餐沆  
瀣載鬼吞玉蟾世味紛濁濁食魚誰溉鬻君來此山中  
相逢一掀髯議論不苟同鹹酸惟梅鹽探索卦爻贖抉  
發天地潛君思方浩浩我足愧霑霑未竟先天奧已報  
歸郵籤重來詰玄秘試與君一拈精神寄四聖後學未  
易覘堪輿物最巨蛭動物至纖雷震與風行水潤復火  
炎孰匪陰陽用豈待蓍策占吾身亦具足誰能減與添

六畫無一辭三才道已兼大象不可名小言徒詹詹九  
師易已病安得惡石斫況復坐井窻周旋類鯁鮎獨以  
嗜成癖食苦自謂甜方此愧施孟敢自比伊濂雄玄倘  
猶白墨突空不黔阿誰登負丘赤手捕長蚺冷然御風  
至瞪目不可瞻大聲忽揮綽皇葵俱口箱竊意吾道孤  
四海謀無僉安知太皞虛前奔有飛廉參同合左契機  
迅留無淹憶昔世道衰九侯已醢醢作易為憂患九卦  
首履謙子雲卒投閣擬易空噉噉君子觀遯象惡在不

惡嚴心易寫不盡恨無千丈縑書空只一畫自向筆端粘  
君如會此意此節真鉗鉗君肯來南山相從效比鷄

和何逢原寄韻

世界歸大壑人事如奔淙浮生萃草木萬變成飄風觸  
蠻兩蝸國王侯一蟻封下觀黔首愚咄嗟書虛空怒攘  
亦蠢蠢羣飛何夢夢失手弄刀劍轉眼生兵戎萬騎鼓  
弓矢千夫駕臨衝原野肆尸血道路哀離鴻帥師有丈  
人在師得師中不辜多全活不與羣醜同師克未為績

不殺真膚公乾坤一胞與感此重戚容涿鹿始爭戰千  
古開武功春秋書戰伐三復為愜忭南風鼓虞氏吾誰  
與王通擊磬斯已矣荷蕢猶可宗無用媿社櫟浪出羞  
澗松君謂叔孫智人笑酈生庸未能半分補政墮一動  
凶歸來友石友相對仲與翁抱神慎守一吾欲師崆峒  
和劉府判寄詩

那有賢貳車抗節今無儕拄笏看千峯冷風散虛齋莊  
陵一絲絕白雲鎖雙崖曷時從君遊聊以紓余懷

贈術士邵易庵

易道皆萬變萬彙寄一易大道降九流至理散方術譬  
猶八面窓八方可從入譬猶九達衢九軌所由出道術  
雖二致殊途極歸一得醫為倉扁得法為軌革郭氏探  
錦囊甘心步璇厯勿謂所執微垂名等籍籍易庵挾四  
技每技探易賸技分易不精君獨精以密我愧絕韋編  
所得止一畫一畫未為病錯出已什伯四事君盡兼懼  
君苦形役持此應世間化身須百億



贈何覺山

昔有二道士學道隱此山一覺徑超詣脫屣遺人寰石  
影未滅沒半出林巒間空山以名存高蹤那能攀下有  
可人翁老去雙鬢斑天涯蹇行足日暮倦鳥還神交藐  
千古試為問丸丹

題邵古香乾坤一亭

一亭亦直寄作者知為誰結薜開戶牖柱桂辛夷楣百  
年此宴樂常恐生憂悲天地一傳舍過客安可羈唐肆

欲求馬萬事隙決駒白雲亭上山流水亭下池夜半撫  
朱繩美人生白髭

送淳安括田省委賈都事

白馬何方來青絲紅錦韉手持省府檄身著從事衫分  
麾莅屬邑銜命司括田一見為鸞鳳不肯為鷹鷂視民  
如有疾見客似無官疲民得賈父僻壤戴蘇天羣情有  
欲慙百口難具宣君來五閱月熟察民顛連嚴為浙偏  
壘淳在嚴萬山按圖覽輿地邑境若斗然一分布阡陌

九分奠山川壑畝雜沙礫斲土見水泉桑不給繭絲農  
不供粥饘耕鑿地力盡租稅民用殫江南享有國錢塘  
餘百年地偏費實浩額外賦益繁和買非正絹茶役皆  
贏錢民窮未忍死上慈政令寬三年輸未足一榜逋悉  
蠲遺黎戴白叟尚能話興元天朝大一統地域跨八埏  
中邦定成賦遠氓均受厘吁嗟天地仁豈使雨露偏君  
歸勿委蛇禁中需牧頗願言述民勞海表同恩波相彼  
西人好東人爭奈何

感懷再和山房韻

幽人癖好山結屋山北方於菟出繞屋寧復劬禿當岩  
溜晴霖霖野燒夕燉煌療飢采紫芝不救病髮蒼何人  
賦小山靜聽心茫茫倚歌和招隱意長曲未央夜夢衣  
雲錦乘虬朝帝旁鈞天聽未了玄運不可常百年少壯  
心時醉歌并涼層城閉青蛾無處覓玄霜亡年兩得失  
奚擇穀與臧齒舌誰墮在寧計彼軟剛千古雲山高軟  
泉醕巖光

慰嚴溪張君貢士

朝日景曛曛湛露溘已晞日暮風淒淒啼鳥失其雛時  
邁感物化撫事成傷悲嚴溪子張子有兒讀父書年少  
雋且文親顏悅以怡一朝成鬼錄登臺空望歸望歸不  
歸來淚盡雙目眇羸博招爾覓忍撫游子衣生子期養  
親安知親哭兒古傷鄧伯道天道不可知穆伯有收子  
暮年良可期

贈相士許松坡

天地委爾形禍福唯所命夭顏壽盜跖窮憲富猗頓陰  
陽氣不齊所受各有分司造秘不言誰能作天問君今  
挾相術兩目炯清鏡開口說是非竊弄司造柄富貴聞  
者喜貧賤聞者愠分定不可移喜愠兩皆病朝暮茅四  
三空使衆狙競安知鳩與鵬小大各適性勸君且歸休  
吾方游神廷

旌表陳節婦古意

庭隅墮缺月慈烏驚夜啼哀啼心獨苦抱雛耿孤棲孤

棲不自恤懷人在中閨  
嫠緯織不成撫杼羗惜  
悽甞甞守孤兒覆額髮  
未齊矢心負螟蠃兩手  
各持携廩粟不自富歲  
以粒遺黎大火化劫運  
終然完白圭遭迴蹇吾  
道三綱墜塗泥鬚眉衆  
婦女媿死一寡妻徽名  
表貞節光彩生門題斷  
雪靈山山濯清沙溪溪  
三唱衛栢舟天橫斗柄  
低

餞于高士

狙公窮四三羸馬疲鉤  
百歸來南山南掃門謝  
俗客有

客扣我扃猿鶴驚  
褫魄行行杖青藜  
吹烟照琴冊雙頰  
凝丹霞秋水入瞳  
碧極談造玄玄對  
坐忘岸幘山巔有  
老杞枯槁無液澤  
夜半出精怪尚或  
聞犬咋祇今吾喪  
我誰能逐轍迹一  
笑容出門山空霜  
月白

次山房贈阮尉燭詩韻

翩翩佳公子青絲  
絡白顛黃綬映春  
花來作吏隱仙鳴  
琴鎮白下賦劍起  
通泉誰分讀書燭  
良價重蠟鞭官燭  
不以照持此當坐  
前釜炊陋貴習炬  
圍嗤少年東壁得



餘光夜續長不眠好留待他日列照修史編

宋庠帥蜀列姬執燭

修唐史人望之若神仙

### 次山房岐絲吟韻

南北本同歸何人泣異岐  
玄黃本同質何人悲素絲  
悲泣不自已吾故憫翟朱  
聖賢急救世猶或與心違  
二子救世心豈願戾厥初  
兼愛與為我本昧善惡幾  
賊人視兼愛殘忍終固知  
失已視為我流蕩返故遲  
安得二子心不為世道思  
吾將責二子一世將焉知

次山房見寄韻

懷人夜寤擗彼美天西方世變急三峽吾道蹇兩當起  
坐觀列緯翕箕正煌煌遊雲起碧落反覆變白蒼兩儀  
浩無際萬期歸渺茫感此不成寐振衣夜未央思君見  
梁月忽若墮我旁月明照我心知心豈尋常浩歌自起  
舞宵景何蒼涼墓梅萃彼鵲葭露化為霜雞蟲兩得失  
奚用論否臧日月此昭質天地吾直剛願言勗本心百  
世垂耿光

感懷追和前韻

寒水不附炭圓枘豈納方心同媒易合分隔意難當膏  
火不盡耀夕暮長煌煌松栢無春華霜雪自蒼蒼萬物  
何定極百世終混茫瞻彼巢林隼胡為水中央夜夢衣  
雲錦乘虬朝帝旁鈞天聽未了玄運不可常百年少壯  
心時醉歌并涼層城閉青蛾無處覓玄霜亡羊兩得失  
奚擇穀與減齒舌誰墮在豈計彼軟剛十年青銅鏡寧  
為垢損光

次山房韻古意四首

思君吹參差幽路塞離絕綠藍不盈襜芙蓉在木末采  
蟲解我憂憂思誰察識世態反覆手況復問宿昔鵠  
豈思揚轍鮒固相沫得時與失勢離附奚足惑耳餘難  
為交管鮑易全德伐木無良朋白駒有佳客

佳人藐中洲倚竹翠袖寒捐玦屬蹇修脉脉一水間夜  
半下雲旗逸駕歛可攀結言永為好矢報念急難君有  
金錯刀我媿白玉盤終然鹽梅心死不易鹹酸往事化

蜩翼徂生遺鼠肝永言歲寒心寤擗長起歎

牽牛飲天河河水清可挹天孫撫機杼終日不成織相望空寤言無人諒心迹人生窘良會百年倏朝夕朝夕不可期來世固罔極無金鑄鍾子鼓瑟逝安適帝子竚不來采芳翳庭實悠悠萬古心俛仰三嘆息

夜舟不藏壑川流無回波百年逐憂樂晝夜相戛摩逝者不復來皓首成蹉跎誰歟傷鳳衰毋乃楚狂歌茲世固難免縱有朝與鮑猗蘭曲易彈祇恐聽者訛折楊雜

黃荅每與俚耳和感此歌晨風忘我將如何

再和

采芳遺所思所思道幽絕濯髮沐蘭膏卷然在髮末鴟  
啼衆芳萎微物固先識我方行邁邁我載歌昔昔操舟  
入觴深被髮出梁沫至人本神游詎知見者惑畏途窘  
善步變境乏全德委順天地間誰主復誰客

火鼠不畏熱冰蠶不畏寒未能蹈冰火吾姑襲人間徒  
駭廣可泳太行魏可攀世路蹇幽蔽遘廻行路難君坐

歌三調我起舞七盤歌苦舞未終觀者心未酸矢言浩  
無極恐彼隔肺肝無言賦悄悄永夜長寤歎

渴不待醴酒行潦聊可挹寒不待羅襦短布聊自織人  
生志富貴役役死塵迹天難報明晨暮鐘送歸夕萬化  
迭故新來者未終極百年無定期餘日姑自適擬學種  
蟠桃誰能待花實海鷗倦長風低徊此休息

劫池出墨灰厄海騰洪波陰陽互剝蝕天地相激摩人  
生壽能幾百歲易蹉跎毋用戚戚憂且賦浩浩歌鶯鳩漸

溟鵬修鯨渺沙鮑物性各有極相企成舛訛順天以全德  
安土以敦和及時且娛樂不樂將奈何

三用韻

大鈞播萬彙運化元不絕芸芸方歸根倏見上枝末年  
華逐流波去去人不識少壯幾何時忽霍異今昔林蔭  
美鳩乳水滑羨魚沫鬢髮忽成霜乍見忽驚惑玄化不  
吾常吾姑守玄德千古萬古人等如傳舍客

瓊樓藐層雲絕棟天風寒阿誰吹玉龍哀響落雲間挿



羽欲相從百尺那可攀脉脉隔綺窓欲語兩俱難當年  
古銅人夜半失露盤露寒濕如水見者為悲酸誰能鑄  
鐵關鑊石為腸肝已夫已矣夫無言付長歎

貧女傷莫年有泪不可挹秦川五色錦半世勞獨織織  
花空過眼新故總塵迹撫機悲歲年顏貌非故夕妾心  
比錦絲絲長恨無極綉衾雙鴛鴦抱此欲誰適沃桑歎  
黃隕尚肯賦梅實悠悠世上兒何處堪食息

何年鑄銅柱請為問伏波薊子去不遠金狄誰再摩世

金匱要略卷一  
變落莽渺吾意成蹉跎盜跖飫肝膾孔聖厄絃歌禍福  
吾欲問當世無史鮑問天天匪高祇恐民聽訛形骸天  
委質性命天委和吾固聞諸天如何復如何

用姪煒之山行韻

惜花急晨遊起坐旦未達騎馬去踏花朝雨馬蹄滑落  
花委塵泥花香在羅襪猗蘭覓餘春牡丹遲未發遊子  
何時歸使我幽憤豁目斷回雁書遙遙楚天闊

誠子

魯語誨時習商書稱時敏一字該二義學者盍重省又  
日新其德成湯常自儆三月不違仁顏子獨深領今日  
或因循明日澡即新前月或斷續此月復即仁聖賢惜  
分陰於此猶兢兢學者能用力其名曰兢辰人有一大  
時一去不復仍十五入大學明德與新民二十曰弱冠  
既冠責成人勤怠只數年賢愚係終身過此為失時人  
不再青春譬之農力穡春耕而夏耘耕耘苟失時無復  
望秋成父母上俱存兄弟下無故飽食無用心白日任

虛度幼壯老復至一朝忽反顧對人語不了握筆書輒  
誤龍鱗映犬豕面目可增惡哀哉復哀哉追悔已遲暮  
及此尚可圖勉旃須早悟

題林同舍初心詩集

與君別一世忽見疑夢境感往雙淚懸華髮各垂領青  
燈對白酒相勗敦暮景別後詩逾佳朗歌竟夜永

贈徐教諭愛蘭

朝采水中芹莫采水中茆采采不盈掬意不在寸草顧

瞻爾子衿憂思鬱中抱濯江暴秋陽豈不日杲杲杲  
雖麗天寒芳易枯槁君來升文堂鐘鼓試擊考轟霆起  
羣蟄沈淖賴雪澡以中養不中寬慈以為寶惟皇均降  
衷三代此直道迪教敦民彝端拜謝師造

歌行

贈天台遇仙翁

天台華頂飛丹霞飛梁絕壁仙人家劉郎歸去不復返  
千年藥徑生蠙蚌老翁家住山谷口入山往往逢青華

授之長生不死藥山頭采采札與砂煉養火鼎成黃芽  
日蘼蔓菁飯胡麻方瞳丹頰生鼎花猶為人世憂龍蛇  
下遊汗漫周八遐手持藥管青牛車更資易數餘齒牙  
占步禍福百不差竭來訪我一舍蝸劇談世事長吁嗟  
我語君君試聽勸君不用六十四卦推天星但願得君  
肘後之丹經普度百萬億生靈君不見安期生李少君  
一匕神樓生羽翎入無間升蒼冥造物雖有數不能圓  
無形人人絕粒餐瓊英免墮巔崖受苦辛

和寄可庵廬教諭

可庵卜築壽藏於家山之麓蛟峯山房南峯  
伯仲來游攜壺荷鍾相與賦詩真一時盛集  
也潛齋何某不得與新丘之樂乃賡載歌以  
自附於四先生之後云

平生浪說齊諧志杞國有天驚墮地不周摧折天柱傾  
咄咄古今真恠事元氣不死橋運興千古日月長懸奔  
照見可庵一片心脾真碑兀揮斤八極游天根兩眼癡

蟄不能食坐觀蜺動自形色獨吸冷風飲沆瀣去向南  
溟六月息不學神仙慕安期陶潛曠達其庶幾卜築前  
窰從與老太行世路從顛危桓魋石櫛嘻未達昭陵玉  
匣荒丘垤東門樹櫬四時青獨對青山問明月孤山梅  
逋仙一去喚不回三逕竹空懷二仲人如玉處士松世  
無鄭老遺高風何如及今收拾千岩萬壑秀飛廉道前  
豐隆後美人服薜帶女蘿自起傚傚舞長袖得時為鳴  
鳳失時為卧龍且問君王乞三峯百年三萬六千日倏



忽起滅天際虹散髮披襟任坦率時澆磊砢寒碧眼  
高一世四海空婢膝奴顏死人役君不見烏棲曲白紵  
歌長繩不繫白日梭時耶命耶將奈何前有香山翁後  
有洛陽老嘉會不數逢千載誰復道蛟翁此來遊三珠  
烟相照憑誰畫作五老圖著我坐隅添一笑

贈徐霞錦

昔日山陰老魏仙丹成飛去三千年倒影滅沒不可得  
誰駕玉犬驂雲輶當年從事君家祖獨向爐邊得丹譜

金人元好問集卷一  
刀圭入口羽翰生至今去作羣仙父丹砂散地無人收  
聚作丹霞如錦毬騰騰五采狎獵起夜半精光衝斗牛  
問君從事適孫子渾家住坐丹霞裏夜窺璇璣落星躔  
晝負丹囊踏山水有時賣易掛白錢醉卧圯橋墮雙履  
問君何事落人間謫業已盡當復還人間處處風雨惡  
不如歸去蓬萊山山上朝霞猶可餐

汾陽徐祥英還家

君不見當年原上武陵家有人隨水覓桃花桃花未落

君歸去到得重來無覓處又不見石室山中一局碁有  
誰採樵不知歸斧柯爛盡俗緣起歸到人間長孫子君  
今採藥入山中一笑相逢樽酒同烏啼花落隔人世不  
知世上誰雌雄令威千年化作鶴回頭猶念舊城郭城  
郭雖故人民非歸去歸去遶高飛

贈星學葉冰壺

祝融擲火驅六龍火輪吐燄燒長空彤雲掛樹凝翠歇  
九根灼爛紅爐中黑菟喘嘯風不起紫蛟噴卧潛幽宮

燕然山高倚絕壁下有凌陰厚千尺阿誰琢雪開瓊花  
貯向玉壺寒照骨層冰底下浴蚕蟲口吐繭絲成五色  
冰姿入火熱不焦那識人間燦金石蒼生病暍死道途  
左擁右扇喚不甦願化冰蚕作冰繭上天下地成冰壺  
得雨行

至元壬午秋夏之交彌數旬不雨建德尹卜  
侯彥才謁烏龍山湫禱焉七月七日澍雨前  
邦侯紫陽方虛谷賦詩歌詠青溪野人何某

屬聞其事從而和之辭曰

萬井泉枯民徙市誰碾火輪燒海底蛇醫墮甕鞭弗靈  
豐隆困卧屏翳死天驅鬼格啄黔氓神龍蓄雨不敢行  
萬樹翠乾禾赤爍田田兆圻龜縱橫卜侯閔雨無處禱  
下問三老及五更為言烏龍有聖水絕頂一泓如鑑平  
尋常澍雨多芳沼頗怪年來雲氣少有時掣電現光怪  
或見盤空形攫矯猩鼯藜藿人不經侯往願乞水一瓶  
得水入城南三日一夕載雨來江亭生來不識此山狀

見說人行躡雲上殷雷下界嬰兒聲培塿千峯那可望  
山高地迥生神靈莫嫌瀦水纔盆盎髻頭一滴落人間  
平地鯨鯢生巨浪世事春花與秋葉野馬紅塵雲起滅  
龍山萬古龍常存年年幻變生鱗鬣歛藏神用潛幽宮  
畜眼草草那識龍賢侯異政今魯恭此心直與神龍通  
吁嗟疲民隔天日那值歲祲十六七麥爛蚕死穀復饑  
溝壑委填憂旦夕及今雨足稻梁紅預期一飽歛幽風  
龍不有功歸我公公不復有歸太空誰解作頌美形容

發微挾眇聲金春老我擊壤歌山中瓣香敬為魯南豐  
飯牛歌為胡子微作

朝飯牛飯牛原上草夜飯牛飯牛霜下藁草香藁軟牛  
飽肥黃犢跳梁健卧噍煙蓑雨笠犢鼻褌飯牛今  
已老有時扣角苦勞碌人世觸蠻等雙角古今名利成  
戰場不似倒騎牛背樂君不見齊甯戚長夜飯牛歌白  
石漫漫待旦骨衣單待旦未明何嗟及又不見百里奚  
未遇時未遇飯牛人不知平生爵祿不入心何故要秦

五羊皮老翁牽牛傍流水水不飲牛寧洗耳入去山中  
深更深蘆管一聲千古意乾坤旦暮不曾知那問人間  
榮辱事

和盧可菴教諭鼓歌

崇牙樅樅賁鼓逢逢始作之以荆衡底賁之新革試叩  
之以巴蜀故產之孤桐雷震一聲草木拆蟻信其屈龍  
起蟄天地訢合萬物蘇陽氣宣聲陰屏迹矇眊一鼓歌  
辟雍始與斯民發童蒙大胥再鼓徵學士復與學者開



天聰當其俎豆前陳甫掖山立綴兆序位登降終日吾  
故鼓之以相禮所以作爾之強力乃若冠蓋孔孟佩服  
程朱鷄鳴而起亦步亦趨吾故鼓之以戒晨所以覺爾  
之迷途至若理欲昏明義利白黑夕惕不謹日省何益  
吾故鼓之以謹昏所以使爾非心之必斥嗚呼鼓人職  
廢周禮湮方叔入漢鼓收聲舉世瞶瞶呼不應千載孔  
堂絲竹音鏜然一鼓驚雷霆撼動天地衆耳醒昌黎老  
死石鼓裂裂愧我才薄爭奈此鼓文

蛟龍歌

蛟峯先生以猩猩歌雞雛吟二章見寄所以  
興起人心維持世教甚切切也其發明比興  
已無餘蘊後有作者無能再出新意矣今輒  
以蛟龍歌答賦猩猩歌希有鳥吟答賦雞雛  
吟前章以昭蛟峯先生之心後章以廣可菴  
老子之意

生物具角齒每與物抗蹈狝虎以剛觸藩羊以壯世

間恠物有蛟龍三百六十虫之長神靈出噓吸變化互  
來往布爪層雲興鼓鬚歛電放無欲不受劉累馴假形  
豈被葉公誑時飛則飛潛則潛所以隨時知得喪莫道  
魚蝦性不靈相依煦沫豈敢嗔江濱鱣鯨久失水聞此  
鼓舞咸相親世無刑醢受時非法網秦然匪藉餘蔭安  
能逃世人亡象齒與革亡猩血與脣有身即有患誰能  
無其身安得此身化為雲隨龍上下雲無心

希有鳥吟

穹壤紛衆羽固有仁不仁鴉鳳雖異性同為陰陽根惟  
彼希有鳥於禽集大威力可振海嶽盼睨似無能鯢鵬  
侈變化比予爾何曾羣鷖偃下風舉受翼卵恩萬里不  
足飛千載始一鳴遠之不可疏即之不可親地維缺不  
震天柱拆不驚安得以寵辱而能累其身世固有大物  
天地間氣生卑卑局耳目夫誰識其真道大固難同安  
能抗世情何如任毀譽徬然忘我不諧衆人口而諧  
萬世心

愚石歌

大塊初分生恠石曾與不周山作骨山崩地缺天柱摧  
片石耆姿轉奇崛媧皇煉石補天工化作五星成五色  
地下為石天上星頑質變化生神靈一朝天狼齧蝕五  
星隕隕石宋野猶有光晶熒何人夜負入海嶼錯雜昆  
吾無覓處中間塊石獨嵌嵌住在錦溪溪上澣石潤可  
以硯石文可以屏鼎鬲或剗鼎廉栗或剗銘不然雲母  
與紫英否則丹砂和空青爾材於用百不適空有千尺

高稜層暴流沒馬不加減霜降石出不加增火不焦水  
不凝刻桐扣不鳴飲羽射不驚世間至智不能化而我  
安敢逃愚名人聞愚惡聞智喜君謂我愚真知己築室  
招子願結交更請柳溪作愚記我笑已愚君更愚世有  
兩愚適相值江流東去夕陽西千古相看只如此當年  
三品不點頭況被旁人鞭得起

芸窓集畫圖

天馬不生韓幹死崔白翎毛落蒿里虎頭妙筆夜通靈

主爵郎中羞畫史揚君畫眼空四海賸把金奩貯奇詭  
榆關牧馬邊草秋一騎一縱驂與騶阿誰青驄嚼金勒  
拔劍奔逐髯怒虬提弓空捍鳴鏑盡塵沙馬耳風飈飈  
篋簫谷中一梢出冷葢相看冰雪骨葵花二色空爭妍  
沒骨丹青翰水墨猿猱兩兩雄顧雌獐鼠伎伎毋趨兒  
水禽並下照秋水足踏枯荷浸蓮漪人間清景能幾許  
野馬戰場祇尺咫芸窓一幅水沉烟俛仰乾坤千古意

贈梅谷高士

去年無方老瞿曇授我雲門一劄禪今年羽衣梅谷仙  
丹法葛翁口談玄無方是兄仲梅谷誤墮凡胎投母腹  
豈非江郎三石人兩石飛來化雙玉君今一字透鋒機  
札斷三關鬼莫窺掇取玄珠入蓬闕自携靈母養嬰兒  
寒山梨棗霜中熟碧蓮池邊結茅屋蛾眉白髮兩瀟疎  
夜抱寒蟾成獨宿相逢丹鼎問金砂笑灌玉泉餐紫霞  
崑崙瑤樹渺何許遼海白鶴還歸家歸去無方問何其  
為說此行奇更奇



和南山弟虎圖行

高堂突兀生崇岡於菟眼電牙磨霜古言市虎人不信  
誰信挾一來座傍衆犬僵仆兒輩走猛士腰弩成蹶張  
老翁卒見亦驚恠便欲騎取叅西皇乾坤戾氣產尤物  
誰為驅雷入神筆古樹蕭蕭風刁刁陰崖幽幽雲墨墨  
橫行顧鬣不畏人美子庭除成穴窟藍田飲羽驚夜行  
今乃捋鬚當白日畫圖畫虎心自知觸目或疑猶喘息  
世間多少涪村民毛爪未完心已易

贈方雲卿地理

金仙頂門一隻眼五眼通神識無限雲卿留得眼一隻  
眼力最高人不識眼裏青囊一卷經照破山川無遁形  
口談禍福句句驗人謂先生真鬼靈自言好眼與人別  
當年點得白龜睛上血龜存雙眼我雙眼兩眼精明光  
電掣有時採珠撼龍宮有時捋鬚探虎穴獨眼獨眼真  
地仙一角靈犀妙莫傳誰知一眼二眼化千眼笑殺時  
師空眼穿

觀慈鳥反哺

有鳥有鳥名慈鳥羣兒啞啞爭相呼羽毛甫集思反哺  
為報父母恩勞勗民彝天理久淪斁聞此肝膽為昭蘇  
禽蟲微物豈知義鳥性至孝由中孚梟獍雛成軀為裂  
伯勞雛長肉已剗天地生物無不仁何至善惡相懸殊  
禽中孝子爾鳥是世上逆子彼二雛父母愛子恩罔極  
子心能似父母無人生誰實空桑出為感物類長嗟吁  
嗟吁不足日云暮老鳥抱雛宿夜樹

贈秋蓬王相士

薰治齒有效

秋蓬秋蓬我不願爵三公亦不願祿萬鍾君謨骨相祇  
如此休向蓬州問李翁迂叟病齒落半空豈是天食蛙  
骨蟲但願壺中乞方七齒髮復出還嬰童漱石清溪歌  
九曲飽飯黃精羹杞菊

有客曰孤梅訪予於易庵孤山之下與之坐夜  
未半孤月在天笑謂孤梅曰維此山與月與予  
是三孤者為不孤矣因相與釃酒更誦逋仙疎

影暗香之句聲滿天地酒酣又從而歌之歌曰  
蹇西山之孤竹兮商周二君藐三徑之孤松兮晉宋一  
人天地冰霜兮木落歸根遺萬物而獨立兮吾梅兄其  
僅存夫孤高不易抗兮故多以落落而遭世之悶悶孤  
潔不易保兮故多以皎皎而受人之昏昏惟涅而不緇  
兮梅質之清磨而不磷兮梅操之貞嗟梅之愛兮曠世  
無聞將梅有心兮千古誰論

昨日王德父何昭德回後曝背于庵後大山上

甚樂因成數語效大山體亦皆寫景聊以寄似  
碧旻收雲兮秋氣肅清萬籟聲沉兮秋日晶熒青山峯  
峯兮白石瑛瑛麋鹿跂跂兮出高陵野鳥活活兮兩岑  
對鳴黃犍濕濕兮逐羝羣或訛或寢兮于野于垌吾忘  
吾獨兮吾與禽獸兮為鄰違市朝兮不與世櫻利名不  
入兮寵辱忘驚聊遺吾形兮放吾情美背曝兮不可以  
遺君時分吾席坐兮採樵負苓吾其徜徉乎此山以終  
吾生兮其樂無央

逐婦吟

逐婦吟思夫君也

妾生不辰兮命孤奇  
妾嫁夫君兮尚髻垂  
被讒放逐兮妾不復歸  
欲出門兮心重悲  
心重悲非別離  
夫與姑命相依  
願姑謹攜持  
山有豺狼水有螭

偶書塔塢水中石

白石兮磷磷  
清泉兮泠泠  
岸有蒲兮水有芹  
敲竹節兮金石聲  
長嘯歌兮驚鬼神  
世間豈無宦海之可航  
仕路

之可騁兮不如此壑之安且平魚自泳兮鳥自鳴花自  
開兮木自榮任我心兮流水等世事兮浮萍上下天地  
兮吾併忘乎吾身

和蛟峯先生熟睡吟

幕蒼天席大地睡去不知人世事覺來榻上總埃塵口  
不能言睡中義古今萬事晝夜同萬八千年祇一寐榮  
辱事真夢裏黃梁一枕邯鄲市北窓謾說晉朝臣周公  
不見吾衰矣日高大五閉柴門不知身世華胥氏不毡



不被老希夷  
山上白雲霞  
流水得失事  
真夢裏  
鹿蕉翻覆終成戲  
人言夜半息  
如雷我縱行  
行還美睡

和仙詩友鶴吟

友鶴仙詩云  
蒼波萬里茫茫去  
駕風鞭霆捲雲霧  
玉堂金屋不歸來  
紅塵向上青冥路  
四海明月五湖風  
飛冲直上凌虛空  
隨風不肯逐西東  
夷猶春空中  
流水一張琴  
清波一壺酒  
撫琴響花灣  
花香侵坐右  
春風飲啄

眠花間羊裘烟雨間仙凡仙中不知凡世事  
游魚鼓舞鷗鷺歡機鳴籟動不自已數聲嘹  
唳一江水江上年來風浪多日午高人驚不  
起

當年隻鶴揚州去羽衣虹裳滅烟霧千年華表不歸來  
來時忘卻邯鄲路短篷月白起酸風天陰鬼哭戰場空  
黃昏欲望城西東亂山青處白雲中誰解歌離騷我自  
斟酌酒一醉醉百年無夢到浙右挿我羽翼兩臂間頂

丹蛻盡毛骨凡下天上天隨君去不與人世同悲歡  
星有語說未已夕陽西去東流水一聲嘹唳入蒼冥  
青塚累累呼不起

鵑啼曲

蠶叢驚靈兩丘土玉壘靈關一荒莽杜鵑銜哀訴千古  
萬里遊魂腥血污冤聲無路叫天公吻血酒地花為紅  
巴江東下流無極目斷巴山歸不得此身豈是無羽翰天  
梯石棧雲漫漫落花冉冉江城暮年年客夢鄉關路大

金匱要略卷一  
夫志氣笑沐猴安知狐死還首丘沛公擊筑歌湯沐錢  
王錦衣衣林木寄巢生子傍他誰衆鳥雖憐祇自悲哀  
號力盡飛不歸老盡遺民城郭非

贈地理錢季實


神仙地理無多訣未用尋龍先看峽次看峽內有明堂  
外峽內堂垣氣結交結深時垣氣牢交結淺時垣氣洩  
回看遠障起星峯認得星峯是祖宗祖宗派下分嫡庶  
庶是旁枝嫡正龍足趾未曾登絕頂如何辨認嫡庶蹤

庶是旁枝為外從嫡子必居堂與中此是大法論嫡庶  
未是窮源尋極致眼前大法既能明更看嫡枝辨臧否  
譬如人家有嫡兒或賢或否不易知賢者起家不肖敗  
嫡枝還更有妍媸到此須是牢著眼切莫泥取嫡謂奇  
龍到成形方結穴若不成形總虛設傾欹破碎縮腫麓  
雜亂擺竄瘦死絕凡屬此類不勞看認得正龍成醜拙  
認形既真穴亦真真形真穴自天成左右必有真纏護  
真案真朝無異情地真氣象自然別山必綢繆水廻折

葱葱鬱鬱日回環入眼精神俱煥發設從流派問源頭  
定是祖宗真骨血雖然龍真穴自真或隱或顯多誤人  
正結人人能識得不識偏頗閃側情地有恠穴無恠局  
認局方知穴法精毫釐之繆隔千里萬水千山差一指  
橫斜直曲跬步間撼動山川泣神鬼一山入脉百山隨  
尺寸高低認玄秘穴真節節自相符若不相符穴是虛  
龍真穴假禍福異誤殺世人徒信書眼力不在書紙上  
泥書空畫葫蘆樣掃除萬卷總虛談收入靈犀一點間

山房約會於黃灘別後寄似

玉堂佳人珮瓊英  
月下乍見心眼明  
貞心野雪壓不死  
幽韻天風吹逾清  
玉龍聲高夜漏下  
綠衣舞短天雞鳴  
歲寒一見苦易別  
安得白頭敦弟兄



潛齋集卷一



欽定四庫全書

集部  
潛齋集卷二

詳校官庶吉士<sub>臣</sub>李如筠

主事<sub>臣</sub>呂雲棟覆勘

總校官進士<sub>臣</sub>繆琪

校對官中書<sub>臣</sub>王家賓

謄錄監生<sub>臣</sub>陳炳

欽定四庫全書

潛齋集卷二

宋 何夢桂 撰

七言律詩

和張按察秋山二首

三百餘年卧甲兵  
天低雨露此生成  
萬家都會樓臺直  
千頃平湖舸艦輕  
環珮玉堂人楚楚  
靚粧珠箔女盈盈  
回頭萬事俱塵土  
惟有湖痕歲歲平

右賦杭州

錢塘日夜水東流回首孤山綠尚稠千載老仙隨鶴去  
百年此地少人遊相逢柳色還青眼說着梅花總白頭  
身後閒名推不去當年誤識薛杭州

右賦孤山

見田察使

玉節星輅御史冠邦人多少路旁觀半空寒月千峯榭  
一軟清泉七里灘天地鳶魚春鼓舞山林雞犬夜平安  
好須借得長年住截斷車輪挽珮珊

贈馮樵隱琴棋

紋楸漫減爨桐焦，贏得無何醉濁醪。  
別墅功隨淮上水，廣陵人化里中蒿。  
知音那似無絃好，當局何如不著高。  
尋取舊樵歸隱處，坐看塵世戲兒曹。

寄王南叟寓江鄉

歌盡驪駒落日寒，相思無處問平安。  
客愁白髮三千丈，世路青泥百八盤。  
夜月梅花頻入夢，秋風菰米強加餐。  
高山如故絲絃在，懶向旁人取次彈。

挽勁軒鄭府理

東林冠蓋舊耆英  
百尺豐碑誌墓塋  
經濟志高官職小  
睦姻義重貨財輕  
永平倉下遺紅粟  
仁壽堂前有紫荆  
夜半山舟誰負去  
蓋棺猶是昔簪纓

燈夕樂舞

天碧星河欲下來  
東風吹月上樓臺  
玉梅雪柳千家開  
火樹銀花十里開  
紫鳳笙繁聲曼衍  
黃龍舞縵影徘徊  
香車匝地紅塵軟  
莫遣銅壺漏箭催

餞竹所叔赴慶元征官和韻

正好山中賦草堂老龍誰喚起南陽青衫華髮劍三尺  
白犬丹雞酒一觴塵世功名蕉下鹿半生爵祿夢中羊  
年來處處波濤險莫趁風帆上海艎

寄王提舉

地到偏方苦雪霜蒼生寒谷望春陽一麾使節來天上  
萬口行碑在路傍里役莊成民弛擔關征法簡旅行糧  
祇今騎鶴揚州去賸得新詩富錦囊

答楊冰崖寄韻問注西銘

勘破西銘識本真添來注脚又重新父天母地元同體  
物與民胞總是春放蕩異端黃老佛紛爭戰國楚齊秦  
要知俯仰皆無愧請向聖賢求事親

邑庠杏壇初成諸老倡和見寄因次韻

雙杏壇前花自春登壇宛見仲尼心千年此樹幾寒暑  
一綫生機無古今西狩事非成反袂緇林曲在尚鳴琴  
閒花滿地乾坤老三嘆遺風感慨深

和宋英叟先塋建亭作

誰表新阡瞰石闕要將孝義軌人寰千年永宅歸元亮  
百尺豐碑葬魯山旌旒尚存青櫨外亭臺半在白雲間  
兒孫自是驂騑種早入君王十二閑

和宋英叟二首

圯上編書未出奇有來相問重相規桑蓬自笑平生志  
泡露誰能萬世基閒去帶鉏編露术醉來呼酒賦江蓠  
青門待得瓜成熟不似西山老伯夷



不堪血淚望長陵回首松楸又幾春  
荒壠牛眠何處是  
古經狐首偽邪真固知遷墓疑非禮  
幸有周棺可託身  
若向防丘逢孔父尚遺馬鬣詔今人

徐仲修寄詩次韻

一枕邯鄲午夢醒好風吹信入軒櫺  
冥搏六月鵬先化  
胎孕千年鶴已靈氣圓陰陽元有數  
道超天地妙無形  
何時共作緱山隱滴露松蘿寫易經

贈尹巽齋易數

萬有滋茲隱混蒙誰開玄竅洩神工易經四聖義周孔  
數貫三天先後中執策不須談管輅太玄休復問揚雄  
只今風起從何入知得風來是巽翁

高縣丞不負堂詩

閒丞八品一官卑許贊男邦問便宜議論是非晴雨異  
刑囚出入重輕疑案頭涉筆余心愧松下哦詩官事墮  
丞得君來真不負祇應百姓與天知

寄夾谷書隱并序

嚴陵書生何某受恩受察於夾谷相公書隱  
先生非可與尋常遭際者同日語自古杭分  
察移按淮安適陟中朝上下四三年間天地  
隔闊莫能寫衷情以寄繾綣此心未嘗一日  
不在鉅鹿也茲因野塘王君朝京便武賦詩  
二章聊寓數千里飯倚之私惠徼采矚

巔崖一落費攀躋汲綆千尋重挈提往事雪中鴻印迹  
舊恩堂上燕銜泥錢塘東去江濤遠銀漢西流斗柄低

天地秋風黃葉老年年春在故桃溪

當年曾憶賦高唐回首邯鄲事渺茫黃閣故人千里月  
青山老我半頭霜交情脉脉園中柳憂思悠悠陌上桑  
吹斷參差天欲暮薄言蘭芷寄衡湘

九日偕府城諸貴人遊南山寺分韻和杜工部

九日詩

寬字韻

飯山吟瘦帶圍寬過得秋來一日歡謾道高風憐破帽  
還應衰髮戀南冠黃花幾度今人老藍水千年時夢寒

日暮歸來成醉倒南山風雨不堪看

有感寄唐月心

日暮佳人雪滿簷不堪重聽楚騷吟游豚吹浪江風惡  
穴蟻坯封山雨深遯世敢談枰外著濟時空抱夢中心  
閒花滿地將軍老莫向東風更鼓琴

賀徐提管可大得子

四十生兒得寧馨試教啼看是真英五文鳳自雲間落  
一角麟從天上生積善家應長孫子讀書種定作公卿

他年大耋還推子謾道同年我是兄

餞何君元赴汾陽儒諭

雪月堂前冷掾廳況如此邑甚於冰行移太白西邊次

居西河

去占高青最上層

邑人亭名

擅冷不然官舍燭俸涼自

糴太倉升詩書莫道同芻狗尚見官牆踐豆登

上張察使老山

元是公侯孝友門及今幾代見初孫便遺柱下持天憲  
暫住都亭洗物寬花影月邊吟子野木從窗外訪南軒

漢庭羽翼須良計誰是商山老綺園

玉節星軺浙水邊好將疾苦問愚黔十年九牧鞭俱斃  
一鼠羣鴉肉未贖地處覆盆遮日月天教持斧拯閭閻  
吳山不逐行人老留取勲名衆具瞻

賡曾省齋舊題鳳翔空壁

滄溟陵陸起黃埃薦福碑驚半夜雷玄鶴歸遲生墓草  
白鷗飛盡上磯苔寒泉辱井留脂水黑土夷陵出燼灰  
往事興亡渾一夢高名千古黨碑魁

寄田察使

尊酒長亭憶別離  
參差吹斷竟誰思  
我懷知己慚淺  
公喜逢人說項斯  
一塢烟霞雙鬢老  
數椽風雨二天私  
錢塘日暮長江闊  
薄擷芳馨結桂枝

山居

短短簷楹小小亭  
先生家住綠楊陰  
軒前樂意青山色  
橋上行人流水心  
半醉半醒時自舞  
獨行獨坐更微吟  
青鸞有約孤雲外  
立盡闌干到夜深



送李縣尹

河陽桃李是誰栽，怕說春歸疊鼓催。  
正好鳴琴看錦水，俄驚飛詔下金臺。  
一堤烟柳離亭路，兩岸風花送客杯。  
百里桑麻正生意，為言來者好栽培。

和方耜岩見寄

世事興亡轉脚跟，長安處處戰場塵。  
種桃一去非秦世，採菊猶傳有晉人。  
已矣覆蕉成夢鹿，誰歟被髮趁騎麟。  
千年尚記遼東路，肯向城頭訪舊民。

感興

賸得田園歸去來江南兩度見黃梅  
軒窗有侶餘松竹  
墻壁無人半蘚苔  
獨抱丹心徒自苦  
相逢白首不須哀  
人間萬事不可極  
一夢蘧蘧心已灰

贈邊縣尹

并序

淳為嚴陵山水縣民之彫瘵久矣  
令尹虛席  
民日望得慈父母  
臨之省部按行博詢興望  
以建德主簿邊公奉檄攝事至之日  
首問民

疾苦登進父老慰諭之民莫不感激居月餘  
田里相謂府公以賢令尹予我惠至厚也山  
人何某嘗以事造庭下得以樵夫禮拜辱不  
鄙徵詩輒為賦二章一章頌其德也二章頌  
其政也尹明敏有力牛刀割雞游刃餘地夫  
東南民力竭矣休養生息使耕食鑿飲不知  
有尹五月報政當有轉以上聞者

君家久富五經儲更有兒孫讀祖書事究麟經明亥豕

理窮義易得筌魚。枳叢不是棲鸞處。花縣來觀展驥初。  
北道主人今有托。華山應得老騎驢。

聲價中州第一流。雙鳬飛下錦溪頭。隱微去處求民瘼。  
潛伏中間破吏媮。暮雨烟村無吠犬。去年荒土有耕牛。  
畫簾餘暇渾無事。好去栽花待勝遊。

和勉齋侄二首

謾學狂吟試筆彊。慚無風度似僧虔。五車不作黃金屋。  
方寸猶存白玉田。萬事混茫隨夢境。一關玄牝透真筌。

北窻人在羲皇上占得清風一榻眠

有鳥千年去不歸歸來滄海劫塵飛白楊北郭行人少  
青草中原戰馬肥喑噫陰陽成物累浮游天地寄身微  
老來盡棄人間事猶占江頭白鷺磯

觀禽鳥哺雛有感賦詩三首示諸子侄

父母人心物豈無靜觀禽鳥見中孚自來擇木心勞瘁  
到得成巢口卒瘡囿翅漸長郎罷短

閩人呼子為囿子呼父為郎罷

身已壯阿婆癯

江西呼子為仔呼母為阿婆

人間恩義尚如此幾個

林中反哺鳥

考叔分羹我獨無不如鳴鶴自相孚世途跋涉牛先喘  
仕路馳驅馬已瘠弗逮子輿三釜養空餘顏氏一簞癯  
蓼莪詩廢遺軀在愧死林中孝義鳥

萬事空花過眼無到無言處自心孚踐頭蘇爨芻何用  
垂耳鹽車馬以瘠野鶴不須驚客去山雌一任笑人癯  
他年史氏求遺藁幸免臺中道嚇鳥

和山房夾谷僉事韻二首

一家南北混車書誰使斯民耳目塗昔日簪纓今役戶  
朝時絃誦暮征夫邇來風雨無完屋何處乾坤着腐儒  
不意斯文天未喪鳳凰來後見河圖

蒼生下土望天仙乞得君恩易地然繡斧聿來霄漢上  
丹書先到湘江邊學徒免隸夫征法官品寧輸戶役錢  
愧死支離疑效報不妨鼓篴樂天年

賀蛟峯先生入宅

富貴朱門蓋里閭先生斲石北山居一區自足子雲宅

三徑何妨靖節廬萬壑風雲生几席四山花木入庭除  
乾淳豈少高官爵自是寒泉要著書

和王石澗儒免韻

鶚林何處聽遺音三歎斯文試共論梁木夢非千聖往  
瓜丘烟斷六經存悠悠滄海東流遠耿耿中天北極尊  
吾道未亡鄒魯在肯教失脚踏他門

和方大山寄韻

老去莊陵一釣竿釣魚猶勝乞麤官十年事業閒中過



千載功名死後看  
往事危枰休下着  
交情枯木獨知寒  
相逢一笑雙蓬鬢  
還倩何人斲鼻端

賀中齋黃大卿得子

聞說南山孕鳳雛  
斬然頭角見嶽巔  
月宮仙桂託根異  
海島蟠桃生子遲  
七袞高年堂上父  
一生足事膝間兒  
朱顏白髮方強壯  
要看梧孫長碧枝

唐昌地理王生求詩

千古青囊破六丁  
太原衣鉢在心經  
天教文字留心印

世有兒孫振說鈴跨斷九龍行地脉踏翻八卦撼天星  
靈犀一點無傳訣莫向山頭泥鬼靈

輓方宮使

鼎湖弓墮賦歸來地折天分泰華顏膝上二雛兵血燐  
樓頭萬卷劫池灰百年豪傑埋荒草半世功名落大槐  
身後有孫酹松栢橋陵金粟暗蒼苔

哭橋陵

百年弓劍入橋陵豈料三泉化劫塵空有魚燈照荒土

忍將玉軸問遺民  
蒼梧日落啼丹雀  
金粟雲深卧石麟  
寒食家家上丘冢  
六宗孟飯屬何人

和岳文二公西湖韻

昆明灰出海揚塵  
老去英雄白髮新  
宮闕崔嵬千里月  
樓臺牢落十年春  
血流杜宇悲遊子  
夢斷梅花憶故人  
立盡斷橋寒日薄  
回頭何處望天津

弔岳文二公二首

擬弔英雄酒一觴  
二公肝膽一冰霜  
金人得策將軍死

宋事無成國士亡湖上黃埃寒栢慘沙場青血夜燐光  
生芻一束新亭淚千古興亡說未央

如此光陰冉冉何青萍失手意蹉跎門前流水溪山在  
簾外落花風雨多百歲身名頭半雪十年世事泪懸河  
相逢莫問升沉事且對尊前聽浩歌

弔維揚瓊花

隻鶴揚州問故家一尊后土弔瓊花人間驚破霓裳舞  
天上徵回玉女車死蘂記曾霑雨露落英誓不污泥沙

後庭玉樹今誰主  
猶得臺城葬麗華

和文山先生

坐對烟煤冷麝臍  
一窗風雨懶幽棲  
蠶叢國破鶻啼血  
王謝堂空燕落泥  
華表有時歸老鶴  
桃都何處聽天雞  
十年往事俱塵土  
莫上揚州唱竹西

丁亥清明和昭德侄孫韻

風吹苦棟結輕寒  
乾石青精屋半間  
潑火雨收春樹綠  
踏青人出畫簾閒  
紅顏白髮悲歡事  
舊日新年夢覺關

滿地落花啼鳥急天涯游子幾時還

和石庵洪府理金沙醑醑牡丹二首庚辰春

金沙開遍牡丹忙更簇醑醑上架芳霞綺羅紈圍國色  
玉堂金屋擁君王粧成三月春光富留得一年花事長  
昨夜紫薇紅藥裏詔君題品是誰香

洛花欲放趁春忙一架花添兩樣芳倚檻白紅多侍女  
臨軒黃紫是真王只愁吳苑館娃老無奈唐宮春恨長  
說與天公須愛惜莫教風雨委泥香

再和張秋山杭州孤山二首

歌舞錢塘厭說兵，悠悠往事竟何成。  
錢鏐鐵箭千年在，伍子鸛夷一死輕。  
湖上園亭春代謝，江頭潮汐月虧盈。  
相逢白首休相問，見說宮門草樹平。

處士橫橋野水流，先生家住暮雲稠。  
百年故國成塵夢，千古青山憶舊遊。  
林下客盟寒白鶴，梅邊詩藁問蒼頭。  
公來但掃墳前竹，莫載虛名入帝州。

和汪子雨問易

玄白紛紛老子雲那從覆瓿覓遺文六爻本自畫前具  
三極都從心上分未許諸儒將見見只應四聖自聞聞  
浪談正墮負苓笑況敢持芹更獻君

寄和竹所叔攝慈溪稅官二首

莫向揚州唱竹西枯桑海水自相知籠中老鶴千年翅  
冰下寒蠶五色絲官小暫淹山谷駕庭閒好和老坡詩  
凌風更上丹山頂應笑人間蟻垤卑

半夜愚翁挾北山頭銜休係舊時官風雲失手劍光冷



霜雪滿頭衣帶寬歸去荒園三徑菊相期晏歲九皋蘭  
年年江上風濤惡不上嚴陵七里灘

和牛知事

白首相逢歎暮年  
棟花風後草連天  
單車載月來林下  
樽酒移春入座邊  
野老爭持寒澗水  
山靈盡掃暮庭烟  
從君去後柴門閉  
惟有閒雲繞屋椽

招隱三首

昔年有約共投簪  
回首紅塵白髮新  
物外烟霞逢野逸

山中風雨望佳人好憑野鶴尋和靖莫待山靈喚孔賓  
遲暮不來松陰落飛柯忍解折車輪

別後頻驚束帶寬相逢亦復笑蒼顏祇今歲月青牛老  
何處烟波白鳥閒千古心期寒綠綺十年世事墮黃間  
修篁倚遍空江暮枉殺招呼費小山

回頭五十九年非千里晨風翼倦飛門外黃塵時事改  
樽前白髮故人稀金河沙煖春鴻去朱雀橋空海燕歸  
惟有嚴陵灘下路年年潮水上漁磯

邑水南夜歸即景

郊原踏遍拾芳蘅歸聽城頭打二更  
野渡無人舟早宿山蹊有月馬遲行  
人家燈落半江影僧寺鐘來隔岸聲  
世路百年雙屐底青山不老白頭生

和毅齋喜雪

阿滕試手下祥雲散入郊原一尺盈  
春近園林先富貴夜深天地更分明  
懶隨柳絮誇安石浪入梅花妬廣平  
明日詩壇期白戰莫將點墨污瑤瓊

和表露石庵韻

乾坤不固夜舟藏去跨青鸞覓玉霜東野詩隨山月墮  
龍門洒落塚泥香生傳嘉祐皇儲疏死奠貞元綠綬章  
九些招魂招不返黃昏豺虎嘯山墻

和閩人龍英玉峯韻

猛拍闌干賦感傷十年往事幾回腸寧能壁與頭俱碎  
安得車將臂怒當太傅長沙悲鵬鳥中郎北海牧羶羊  
天荒地老英雄盡萬古青山只故常

病鶴衰翎歎折傷，惟餘芝草療飢腸。  
陣圖死不忘魚復，江艦生難候馬當。  
自分無帷埋畜狗，尚憐有肆返屠羊。  
頭顱老盡心猶在，夜半鈞天夢太常。

挽袁安人徐氏

政自傷悲歎緯嫠，可堪重賦柏舟詩。  
鳩憐隻影營巢瘁，鳥喜孤雛返哺慈。  
半世苦心生自媚，百年貞節死方知。  
曼曼世路成孤憤，慚愧山前讀墓碑。

和李經歷見寄韻

白水輕烟古輞川，滿山紅葉稻平田。  
悠悠客夢孤雲外，落落詩情夕照邊。  
天闊風高黃鶴影，江空歲暮白鷗緣。  
推敲不任騎驢去，卻訝昌黎識浪仙。

李郎中有詩謝寄藤杖，仍次韻答之。

海南覓得古藤枝，持與詩人杜牧之。  
紫貝斑文鞭更爛，赤龍蒼骨蛻尤奇。  
路無夷險終全節，用有行藏一任時。  
非但與君扶脚力，鏐蛟剝虎要支持。

和方山房韻寄李郎中

世路悠悠水上萍相看誰與眼長青  
千年彞鼎觀勲業  
一代圖球見典型  
謾道石能生白壁  
自知竹已化青寧  
絕憐驛路梅花白  
肯落空江杜若汀

梅杖詩

曾向孤山刷薜蘿  
根株栗擲試摩挲  
持身慣歷風波路  
回首還憐雪月坡  
鐵骨自將惟世用  
赤心不偶奈時何  
會尋蒼竹成龍去  
莫向葛陂深處過

夜坐有感

銀漢無聲玉漏沉樓高風露入衣襟  
洞龍睡熟雲歸岫枝鵲啼乾月滿林  
甕裏故書前世夢匣中孤劍少年心  
征鴻目斷關千角吹盡參差到夜深

存廚徐君徵生挽歌

一厨聊寄等歸藏荷鍾携壺畢此鄉  
逆旅不歸前路惡蓋棺未了後期長  
墻中酣飲自忘癘道上哀歌人笑狂  
千古心存千古事青山流水付於塘

偶成



一卷南華一炷香身閒隨處是仙鄉竹聲侵戶朝眠覺  
花影移堦晝坐忘杜曲自耕貧亦樂柴桑可葬死何妨  
悠悠往事俱塵土剩得頭顱上雪霜

再用前韻

沉水烟銷寶鴨香山窩人在水雲鄉魚非惠子同魚樂  
蝶化莊周併蝶忘心了箇知身是寄物齊寧與道相妨  
清明即是神仙界不用丹爐煉玉霜

小有山中即事

閒隨鶴影步山蹊  
摘草歸來養竹雞  
水帶平沙流澗淺  
雲將落照壓山低  
覆堦亂葉憑風掃  
護徑叢筠借鷺棲  
萬物不言皆自得  
此心觸處見端倪

偶成寄王德甫

休休萬事總歸休  
猶占青山對白頭  
籟寂乾坤機落落  
境忘身世夢悠悠  
孤雲野水遼天鶴  
明月清風露地牛  
此意不知誰會得  
一聲鐵笛萬山秋

和王德甫見壽二律

百年閒夢寄山窩，世態人情任唯阿。  
竹裏貞心經歲老，梅開白眼看人多。  
身從野叟分樵牧，莫遣山靈掃桂蘿。  
黃閣朱崖身外事，一蓑牛背夕陽歌。

竈墮丹飛，昔未仙重來人世了。  
前緣自憐白髮隨孤影，空撫青萍憶少年。  
黃菊秋餘花尚耐，玄梨霜後果初圓。  
問君何以為翁壽，但誦黃庭內外篇。

挽新城徐峴山

騎鸞一去貌塵寰，萬里天風杳珮環。  
江海十年生白浪，

星霜七袞隕朱顏  
瑶池月墮夢中夢  
翠峴雲歸山外山  
身世到頭秋露盡  
吟魂猶自在人間

道汾陽不及訪逢原蒙寄詩次韻

浮槎曾誤客星占  
屐齒空傳遍好山  
弱水方壺三萬里  
武夷玉女九重關  
塞驢有徑穿花外  
短棹無人出葦間  
不是鍾山真勒駕  
自慚松桂莫能攀

王石澗賦小有洞天之詩卽青谿和之輒次韻

奉謝

并寄  
青溪

自憐惡石很難鞭  
歸去漁樵結老緣  
野鶴分無軒上祿  
醯雞粗足甕中天  
病來摩詰非真佛  
睡去希夷已半仙  
僻好自耽如嗜酒  
醉鄉休與醒人傳

和韻問魏石川疾

謾道無丹蛻骨凡  
繡襦不換嫁時衫  
老大倘未忘周孔  
巫鬼何須問抵咸  
身健加餐親鼎餽  
眼明減藥認囊械  
山中吠犬千年杞  
采采猶堪饜吻饒

不是塵中骨相凡  
蓉裳蕙帶芰荷衫  
勿疑有疾淫成蠱

須信無心感是咸  
裏藥曾經丹竈火  
裁書祇欠土奩械  
病餘努力加蔬飯  
莫笑簣簞太守饒

靈山何許問巫凡  
狹地知難旋舞衫  
枕上病雖憂白傅  
床前教肯媿陳咸  
君宜借力寬詩課  
我亦埋頭事樂械  
種术養兒隨分足  
豈因富貴墮涎饒

贈董君竹梧亭

買得園亭樂賦歸  
一庭翠碧映參差  
自憐封戶培新笋  
更喜添孫養嫩枝  
翠袖倚看雲影亂  
銀床坐對月陰移

沉香欄北花如故富貴無心懶賦詩

山窩適興

剩得閒身鎮自憐更憐閒占此山泉滿階碧草客稀到  
半榻白雲人對眠窻影枝搖知雀踏壁痕苔濕認蝸涎  
日長靜看辛夷樹落盡閒花忘宿緣

感興

坐斷乾坤老一窩修篁翠袖自婆婆半生夢覺青山在  
萬世期長白日過雲影對人閒裏好禽聲入耳靜邊多

舞雩不是真狂者樂上心來可奈何

擬將物化問漁樵妙裏無形本寂寥大地雲生千嶂雨  
中天月上九溟潮山河劫運九中化世界塵緣座上銷  
此意到頭誰會得任他人道似逍遙

次山房韻

天教龍馬現河圖盡把先天授伏羲三極都從九裏出  
六爻只向一中推易如可毀乾坤熄神本無方晝夜知  
三聖有憂辭已贅寥寥千載復何時



易寂無為有感幾幾存萬物未生時陰陽理向極中看  
天地心從復處知潮上海門探月窟日迴地戶濯咸池  
何時騎鶴研朱露共勘經圖叩古義

西狩事非文殆喪春陵書出道寧孤六經有舌存先聖  
千古留心付後儒杲日麗天隨處見逝川行地幾時無  
齋居珍重賡歌意即此全吞太極圖

己卯春過西湖

世事誰家屋上烏重來猶認舊西湖風帘隔岸自高下

烟寺前山半有無野水荻蒲飛屬玉夕陽欄檻喚提壺  
十年不記梅花夢試向孤山問老逋

再用前韻和諸公

白髮星星紗帽烏怕隨年少過西湖清明上冢行人少  
寒食開門宮使無半世行藏隨杖屨百年悲樂寄樽壺  
歸來第五橋邊路半樹殘陽噪畢逋

和昭德孫燕子韻

飄零短翅歎誰同猶記當年繫足紅人事合離夢槐國

歲時來去旅新豐  
新樓綠幕無巢地  
故國烏衣隔海風  
說盡興亡人不識  
春風雙淚白鬚翁

再和

說著興亡事不同  
且斟玄玉駐顏紅  
雲軒夢斷宮花逝  
綵縷盟寒墓草豐  
處處社時茅屋雨  
年年春後棟花風  
人間不是無棲處  
要認當年舊媼翁

和梅鏡寄韻

未能生翼化鯢魚  
誰御冷風問太初  
十載青衫關洛客

半生白首楚橋書塞驢豈解思長道病鶴徒知戀舊廬  
世有二程精說易臯比何事到橫渠

和酈僉事見寄韻

詩書無用戲侏儒兩序今猶見壁圖末路弟兄知己少  
中原人物似君無曲終湘水絲繩絕書入昭陵筆硯蕪  
珍重江南春信早暗隨梅萼到西湖

半世虛名我誤儒樊中短翅倦南圖黃塵世路千年改  
白髮心期四海無績紡婦慵麻褐短耕鋤兒懦豆田蕪

老來萬事心灰盡只願君王賜鏡湖

病起有感

聲乾木鐸說鈴非天地無情世運奇吾道悠悠川水逝  
人才落落曉星稀百年身後千年遠萬箇人中一箇知  
一曲汾亭彈未盡卻教漁父洩天機

汾陽諸公招徐祥叔歸代之答謝

富貴男兒畫錦衣天涯漂泊衆心違人情鈎餌驚魚去  
世界瓶羅礙雀飛隱去甘從山鬼喚狎遊寧墮海翁機

草堂猶在終歸去只恐風塵白髮微

澗陵望斷憶玄暉一片春雲渭水涯  
洞裏桃開成隔世山中柯爛忘來時  
歸休韋曲應無賴隱去玄真那有詩  
松菊相逢如見問此心欲寄已忘辭

和何寧谷韻

一曲樽前浩浩流年容易隙駒過眼前  
白髮故人少郭外青楓古塚多  
流水不彈嗟老矣雍門欲聽奈愁何  
回頭城闕應非昔還記千年老鶴麼

歸途再得八句併寄

石田歸去醉時歌  
白日飛颿送客過  
舞袖低旋兼地狹  
出門長嘯覺天多  
子卿朔漠知存否  
武帝秋風奈老何  
極目西陵臺下路  
漳河東去復來麼

何逢原寄和章再和前韻

日暮歸來彈鈇歌  
詩筒何處又相過  
人生百歲樂時少  
春色三分塵土多  
愧乏丹砂修渾沌  
且拚樽酒醉無何  
近來江上風濤惡  
還有閒鷗似我麼

和昭德孫聞鵲

平生抵掌志伊吾  
聞著鵲聲淚血枯  
故國蠶叢千古恨  
霧闕熊耳一身孤  
自從飛去啼痕在  
縱不歸來有夢無  
莫向延秋門上叫  
門樓無數白頭烏

和抱甕馮提學二首

吁嗟世事落黃間  
倦矣人間行路難  
流水已隨鍾子老  
仙舟徒羨李膺觀  
從來豪傑為時出  
到底功名耐久看  
大廈將成要梁棟  
雪深方見玉龍寒



山人日卧嶺雲長扣戶詩書枉紀綱多病半生雙白髮  
相思一日九迴腸人情取舍成芻狗世事興亡化石羊  
明日相逢且拚醉轉頭三萬六千場

聞琴一首

自呼濁酒賦江離一曲朱繩萬感隨沙漠美人青塚恨  
關河壯士北邙噫無人流水音誰賞老我雍門聽轉悲  
夜半月明天籟寂飛鳥猶自遶南枝

贈喬縣尹

神君當日謫民謡

喬智明為隆慮令民愛之號為神君

復見君來試割刀

花下簾櫳閒訟牒  
柳邊亭榭見旌旄  
旄農桑課最繭絲殿  
芻秣征寬馬骨高  
泉出後田渾不飲  
恐他滴滴是民膏

寄方龍溪

欲扣玄關訪僊人  
人間無路鐵鞋穿  
瑯邪舊約驚千載  
嵩嶽新來下二仙  
肯把丹砂分藥鼎  
便將白玉種芝田  
瓣香欲謝雙巖過  
卻道龍溪合受拳

樂意

真樂攻心無奈何自行自坐自謳歌雲收雨淨天無滓  
月朗淵澄水不波更把新詩勾野興時將濁酒發天和  
傍人笑我荒唐甚真樂攻心無奈何

挽寧谷居士何公三首

英雄千古入泉臺八十餘齡死更哀隱谷雲歸龍已老  
吟壇月墮鶴空回黃花滿地詩人老青櫓成阡弔客來  
白髮蓋棺公事了朔風世路正黃埃

天寒白月墮西湖血淚啼枯聽薤歌食子俱亡收子在

近孫猶少遠孫多北邙有地存詩窖後圃無人負鞠窠  
欲誌魯山慚四絕空遺陳迹照松蘿

鼠遶枯藤齧未休得如此老死何求翁踰八十媪黃髮  
孫見曾玄兒白頭身世幅巾歸繭室歲時盂飯洒狐丘  
百年心事無人識分付黃花滿地秋

挽閭門唐中齋

英州別駕老昭陵尚有錢塘八代孫三畧兵書生未識  
百篇詩史死猶存羊公峴首行人淚白傅龍門過客樽

孟飯寢園誰是主  
鳳亭霜露有雞豚

挽吏部劉謙山

猶記青原白鷺盟  
轉頭宿草上新塋  
屋梁月落丹心在  
海水天寒白髮生  
樽酒十年兒女淚  
篇詩兩地弟兄情  
蓋棺事了君無愧  
未死遑知身後名

感寓二首

西風落日怕登樓  
倚遍闌干萬古愁  
衰漢竟成三國誤  
秣陵不蓋六朝羞  
江山有恨留青史  
天地無情送白頭

擊碎唾壺歌不盡荒臺殘雨夢揚州

試向昆明問劫灰幾看麋鹿上蘇臺間中歷日生青草  
夢裏乾坤化大槐塞雁南歸春又去江潮東下暮還來  
臨平山盡啼鶻歌可是征人喚不回

挽太學正節先生徐應鑣

國破君亡一死宜絕憐兒女死如飴龍池久負媯皇誓  
蛙坎空遺烈士悲洗骨不汚唐六館瀝心無愧趙孤兒  
北行多少生還客休向梯雲讀墓碑

寄淳安括田省委賈都事

括田馳檄遍封提分得清官照錦衣百里春風生几案  
千村甘雨自鋤犁江南地狹人民夥燕北天遙日月低  
歸覲九重如顧問尚歌雲漢勞遺黎

送平石姪孫還杭

東風吹雨濕平蕪三疊陽關醉唾壺往事盡隨塵世界  
新來祇恠老頭顱百年祖父留湯沐千里兒孫有飯盃  
目斷長亭休折柳斜陽山外是西湖

送嚴郡知事石綉回鄉

三年幕府髮成霜，刺得行歌載道傍。  
瓜戍春濃官又滿，蓮池人好水尤香。  
燕然碣石去程遠，江水雲山看日長。  
倚遍修篁衣袖薄，長亭無路折垂楊。

送入都僉事

天教持斧下錢塘，來為蒼生滌痼瘡。  
胷次對天懸日月，筆端隨地轉冰霜。  
雲山有分高名在，江水無情清議長。  
臨別折梅嫌太俗，斲將冰雪薦瓊觴。



和尉衙落成贈阮梅仙

梅仙貴介出侯門庭砌猶傳有紫荆黃綬銅章官小試  
青溪花縣室初成公衙好作三年計少府香留百代名  
田野近間多大吠夜深刁鼓要分明

挽吳靜軒

手摩銘碣吊延陵落日青山昨夢驚狹世路危行卻曲  
浮生事了去分明竹林熠耀飛臺榭石壁鈎輶叫塚塋  
珠鴈玉龍今在否漆燈千古照佳城

赤壁夢鶴

遼海千年約未寒一樽還酹大江干夜深睡熟忘身世  
天闊歸遲化羽翰滿界紅塵飛不下半船明月笑相看  
起來開戶無人迹數盡枝烏弔老瞞

和雪

天上瓊樓一夜開雲林先約意徘徊靈河前水急飛落  
色界憑風緩下來霓舞未闌離月殿蛾粧初試度陽臺  
自矜顏色難為偶嫁得梅花卻占魁

送胡簿秩滿歸

佐邑三年去後思  
祇今無奈送行時  
不諧白雪皇華目  
謾指清風惡木枝  
臺府無心空裏鏡  
士民有口路傍碑  
錦溪流下嚴陵瀨  
八月潮來有轉期

承書言別再寄

一曲離鸞感寄心  
此心誰解試分明  
百年耆舊閒中話  
千古溪山去後名  
雙鯉尺書兒女淚  
隻雞斗酒弟兄情  
男兒須勒燕然石  
歸拜堂諼始是榮

寄贈潘氏積善堂

市義今無古孟嘗不圖近見鄭公鄉布金地已成祗樹  
簞食人應遍翳桑身享九齡耆壽福眼看五世子孫昌  
天公有耳長聰聽多少行碑在路傍

灞橋騎驢

小驪買得最便宜好是河梁古柳涯風急吹沙長耳峻  
雪深沒板塞蹄遲據鞍吟透肩雙聳敲鐙歌狂帽半欹  
道上莫教逢大尹推敲白裏不曾知

送陳治中勿齋二首

天台萬丈下靈光便合乘旗翳鳳凰  
身在金臺天北闕手提銅柱地南荒  
一生許國心如鐵萬里封侯鬢未霜  
別駕小淹元不惡公來私得海沂康

簾篁三載誦賢侯折柳郵亭菊又秋  
無翼解隨雲北去有心長注海東流  
千崖雨意留行旆七里灘頭送去舟  
蚤為蒼生題福筆尚回麾節顧滄洲

挽徐子愚母太安人

萱花落盡北堂空  
龍領碑銘百尺豐  
鄴紇晚婚無徵在  
孟光不嫁有梁鴻  
一官得子榮身後  
四世看孫滿眼中  
三酹生芻人似玉  
故丘狐首此封崇

挽方中立同舍

回首爐亭夢已非  
英雄老盡壯心違  
釣天雲散蒼龍墮  
華表風寒白鶴歸  
往事悠悠川水逝  
故人落落曙星稀  
樂天無子留孫在  
多少龍門客淚揮

又代人

一曲哀歌老淚垂  
英雄不偶數孤奇  
百年事墮槐安國  
半世名成薦福碑  
無祿逮親生自憾  
有孫表墓死何悲  
黃門靖節均生死  
清議無情更屬誰

送阮梅仙

佐邑三年吏隱仙  
聲名留照錦江邊  
才高不受青衫束  
官小聊將綵仗懸  
流沫呂梁游十仞  
搏風溟海上三千  
沙頭雙玉難為別  
一曲離歌約暮年

贈電目相士

知君說相壓南州相我空貽白髮羞但得羊裘歸釣澤  
安知燕領去封侯窮通有分都休問出處難言已自謀  
一笑相看出山去逢人莫道見壺丘

挽汝南來君

一曲哀歌行道難滿堂試聽一潛然兩兒青紫開榮路  
五世曾玄送暮年喬木受風危易撼孤舟排浪險終全  
故丘孤首君無憾寒食年年洒墓阡

同挽前人



黃金不鑄百年身世變相靡白髮親龍角墓碑生古藓  
砥如亭路落緇塵明時事業留諸子前代衣冠見似人  
得失雞蟲都莫問故丘抔土是全真

同挽前人

桐木山西送落暉百年耆舊數他誰畏途幾歷青泥險  
往事惟餘白髮知今代衣冠遺此老前朝簪笏付吾兒  
明朝歸葬西邨路五世哀思百尺碑

挽檢院吳對山

峯粵山前弔隱君招魂九些淚雪中風雲失勢丹心死  
天地無情白髮新西洛衣冠遺一老東籬詩酒是全人  
蓋棺事了應無媿消得新阡號逸民

挽南坡章知縣章運使子家則堂誌

豐碑二絕照新阡節義成名得象賢善政人能書棠邑  
寬恩民尚誦公田家翁不負心傳印家嗣能忘手澤編  
仕學一生行未了後來好為拂青氈

挽邵青谿二章

尊酒生芻弔舊遊  
白髭老淚故山秋  
百年勲業黃梁枕  
一代文章白玉樓  
豪傑彫零天地老  
山河牢落古今愁  
行人不軟青溪水  
付與閒翁對白鷗

貞元一曲淚霑巾  
蒼舊今能有幾存  
斗酒隻雞空酹冢  
縞衣匹馬尚招魂  
百年身後事終定  
千古眼前誰共論  
試問故侯瓜熟未  
青門猶自有兒孫

山居即事

分得南窻與世違  
坐消白晝樂清時  
樓頭秋意一聲笛

鏡裏歲華雙鬢絲綠水放教通竹徑清風招不下梧枝  
心期自得難為說白鳥青山是已知

贈舊同舍王景陽

何許相逢客路岐相看鬚鬢各成絲兩年衰病苦牢落  
千里故人傷別離江月不遺流水逝天風未起老桑知  
人生百歲先朝露惟有貞名死不墮

送高叅政

聲名蓋世古人豪天遣西來展六韜狐鼠何能嬰虎旅

鯨鯢猶合避龍刀將壇七拜功增重省府重登官轉高  
他日中書勲第一汾陽應只是兒曹

送馬高叅政

瘦骨丰稜產渥洼幾年俛首服鹽車穿花久失青絲轡  
莖豆誰憐白鼻騮汗血浪誇空北冀風蹄猶慣步東華  
錦鄣不肯汙泥水好去侯門逐五花

寄壽王直卿省郎二親年八十詩二首

金盤玉筋脯麒麟榮福堂前壽二親白髮宋州老司馬

紅顏晉國太夫人生時曾結同年會見世重來兩佛身  
庭下有兒歸省掾執鞭時自導雙輪

二老婆婆出壽筵綠衣人好舞蹁跹餐桃阿母臉猶玉  
食杞仙翁頭返玄堂上相看新八袞尊前重話舊同年  
累茵列鼎人間有安得親庭此樂全

上留尚書

昆明池劫化靈緇夢覺功名黍一炊鍾子未將南操變  
庾公空抱北朝悲歸來眼底湖山在去後心期浙水知

白髮門生憐未死青袍留得裹遺骸


挽何此園

南窗一枕夢槐安咽鼓悲笳生暮寒壽極星移隋芒角  
詩仙身蛻失九丹扶藜記與漁樵話種菊留教孫子看  
歸去休休言不盡殘陽木末亂鴉盤

偶成

喚醒邯鄲出夢闌悠悠身世隔塵寰飛鴻落照琴三疊  
流水寒花屋半間老不如人甘遜世閒誰似我得看山

乾坤許大雙螭角消得人間戰觸蠻





潛齋集卷二